

Powšitkowne WOZJEWJENJA

njedźelu, 25. awgusta 2019

Serbowka zloži časne sluby

Ze Sulšec pochadzaca sotra Alojsia Rječkec zloži přichodnu wutoru, 27. awgusta, na Božej mši w 10 hodž. w hornjopfalcowskim Auerbachu swoje časne sluby. Před dwěmaj lětomaj bu wona tam w rjedže šulskich knježnow Našeje lubeje knjenje zadrascena. Nětko je nowiciat zakónčila. Dotal je wona pođra lěta w Auerbachu jako hortnerka džělała. Po časnych slubach budže wona kubłarka w pěstowarni w Höchstadće, ležacym mjez Nürnbergom a Bambergom, skutkować. Za tři lěta chce potom wěčne sluby zložiť. Sotra Alojsia by so z bohateho wobdžělenja na Božej mši wjeseliła. Wona prosy wšitkich, zo bychu so za nju modlili.

Kemše za tych, kotřiž druhich hladaja

Do Worklec su wšitcy ći přeprošeni, kotřiž so doma abo tež powołansce wo hladanja potrebných ludźi staraja. K tomu budu štwórtk, 29. awgusta, we 18.30 hodž. w tamnišej kapałce kemše. Po tym su woni na zetkanje do něhdyšeho hrodu přeprošeni, hdžež wustupi spěwotwórca Uwe Pfennighaus. Worklečanske kapałkowe towarstwo a Hornjołužiski zwjazk Carity na tónle wječork pod hesłom „Hladarjam chorych budź džak“ přeprošujetej.

Zetkanje samostejacych

Samostejacy ze serbskich wosadow su na swoje přichodne zetkanje štwórtk, 5. septembra, w 14 hodž. do Domu biskopa Bena w Smochćicach přeprošeni. Zajimcy njech so prošu hač do štwórtka, 29. awgusta, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdžěli.

Swójbne popołdno na Kukowskim hrodzišću

Dekanatne dušepastyrstwo přeprošuje wutrobnje na swójbne popołdno njedźelu, 1. septembra, na Kukowske hrodzišće. Wot 14.30 hodž. poskići so swačina a w 15.30 hodž. je nyšpor. Přizamknu so wšelake poskitki za džěci, młodostnych a dorosćenych.

Za wulět dekanatneje młodžiny so přizjewić

Přeprošujemy wutrobnje na wulět dekanatneje młodžiny njedźelu, 15. septembra. Zetkamy so 11.45 hodž. při dwórnišću w Kamjencu. Potom pojedźemy z ćahom do Drježdźan, hdžež wočakuje nas wodženje po wustajeńcy w Hygienowym muzeju a jězba z tak mjenowanym „conferencebikom“. Přinošk wučinja 25 eurow na wosobu. W nim su jězba z ćahom, wječer, zastupy a jězba z „conferencebikom“ zapřijate. Přizjewće so prošu z mejlku hač do pónđzele, 2. septembra, pod don.boskowy-dom@t-online.de a napišće swoje mjeno, starobu, hdže bydliće. Městna za wulět su wobmjezowane.

Dekanatne dušepastyrstwo za młodžinu

Přednošk k stawiznam Małeho Wjelkowa

W něhdyšich sotrowskich domach na Zinzendorfowej dróze w Małym Wjelkowje porěči Lubina Malinkowa sobotu, 31. awgusta, w 20 hodź. k temje „Mały Wjelkow – serbski Ochranow“. Wšitcy su wutrobnje přeprošeni.

Do klóštra hlubšo hač přez klučikowu džěrku pohladać

„Jeho słowo płáci tebi! Wjace hač pohladnjenje přez klučikowu džěrku. Dny za chutnje zajimowane žony.“ Pod tutym hesłom přeprošuja cistercienski klóštra Marijineje hwězdy wot pjatka do njedzele, 6. do 8. septembra, k sebi do Pančic-Kukowa žony, kotrež začuwaja, zo su k duchownemu žiwjenju powołane a zo chcedža so prašenju swójskeho powołanja wěnować. Jim skići so składnosć, wšědny dzeń w klóštrje kónc tydženja dožiwić. Přizjewić měli so zajimče pola abatisy Gabriele Hesse, e-mailowa adresa aebtissin@marienstern.de abo z póstom na adresu Cistercienska abtownja Marijina hwězda, Čišinskeho 35, 01920 Pančicy-Kukow.

Nuncius přińdže do Ralbic

Bamžowy wulkopóslanc w Němskej, japoštołski nuncius arcybiskop Nikola Eterović, přińdže wutoru, 10. septembra, do Ralbic. W 9 hodź. budže wón Božu mšu swjećić, na kotrež so mjez druhim honorarowy konsul Chorwatskeje dr. Peter Neumann wobdžěli. Zwonka toho wobdžěli so z Chorwatskeje pochadźacy arcybiskop Eterović, kotryž so tež za Serbow zajimuje, na zhromadźiznje w Koćinje. Poprawom by wón Božu mšu w Kulowskej wosadneje cyrkwi swjećić, hdžež je jeho krajan Jan Šadovic pochowany. Dokelž pak tam tuchwilu twarja, budu kemše, na kotrež su wšitcy přeprošeni, w Ralbicach.

Městna za dobrowólnu službu hišće swobodne

Zwjazk Carity poskićuje wot septembra hišće městna za dobrowólne socialne lěto (FSJ) a za zwjazkowu dobrowólnu službu (BFD). Zasadzić móža so mjez druhim w Pančicach-Kukowje, Kamjencu a Budyšinje. Zajimcy měli so pola Drježdžansko-Mišnjanskeho Zwjazka Carity w referaće za dobrowólnu službu, telefonowe čisło (03 51) 48 42 40 50 abo z mailku na adresu fd@caritas-dicvdresden.de přizjewić.

„Žiwjenju křidła dać“

Dom biskopa Bena w Smochćicach přeprošuje wšitkich, kotřiž sami bydla, wot soboty do njedzele, 31. awgusta, do 1. septembra, na zhromadnej dnjej z druhimi singlemi. Pod hesłom „Žiwjenju křidła dać“ poskića so wšelake temowe koła a zhromadne akcije. Nadrobniše informacije dóstanu zajimcy pola Ansgara Hoffmanna, telefonowe čisło (03 59 35) 2 23 17 abo pod www.benno-haus.de.

Seminar ke kreatiwności a spiritualiće

„Zrawić – čłowjek so stać“ rěka titul seminara, kotryž wotměje so wot pjatka do njedzele, 13. do 15. septembra, w Smochčanskim Domje biskopa Bena. Při tym dže wo to, sej „nutřkowe swěty“ wotkryć, kotrež móža so ze swójskej kreatiwnosću, molowanjom wobrazow a symbolow zwuraznić. Kurs nawjedujetaj farar dr. Hans-Konrad Harmansa, kotryž je hewak nawoda eksercicijow a duchowny přewodžer, a Maren-Magdalena Sorger, duchowna přewodžerka a terapeutka za molowanje a wuhotowanje. Zajimcy měli so pak pod www.benno-haus.de, z mejlku na adresu referent@benno-haus.de abo telefonisce w Smochćicach pod čisłom (03 59 35) 2 23 17 přizjewić. Tam zhonja nadrobnosće.

Kocorowy rekwiem zanjesu lětsa w Ketlicach – serbscy spěwarjo jako podpěra witani

Wumělske herbstwo pěstować, kiž ma swoje korjenje w bliskej domiznje – z tutym zaměrom nazwučuje ewangelske kantorstwo při cyrkwi swjateho Mikławša w Lubiju pod nawodom cyrkwinskeho hudźbnego direktora Christiana Kühny lětsa Korle Awgusta Kocorowy „Serbski rekwiem“. Předstajenje je njedźelu, 10. nowembra, w Ketličanskej cyrkwi předwidžane. W njej je Kocor lětdžesatki skutkował. Sobu skutkować budu Lubijske kantorstwo z hosćimi, mjez druhim z tamnišeje katolskeje wosady, solisća a Žitawski Collegium musicum. K zesylńenju chóra su dalši, přede-
wšěm serbscy spěwarjo wutrobnje witani. Proby su wotnětka kóždy pónđzelu wječor wot 19.30 hodž. na hudźbnej žurli Lubijskeho Gymnazija bratra a sotry Scholl, Pestalozzijowa dróha 21. Naprašowanja su móžne pola Friedharda Krawca, stajneho spěwarja w chórze kantorstwa, telefonowe čisło (0 35 85) 4 13 72 48.

Zwjazk Carity pyta hladarjow

Hornjołužiski zwjazk Carity pyta fachowy personal hladanja chorych ludži w swojimaj socialnymaj stacijomaj w Kamjencu a Budyšinje. Džěłowy čas je fleksibelny a na službne potrebnosće wusměrjeny. Zwjazk Carity skići njewobmjezowane džěłowe zřěčenje hač do 30 hodžin wob tydžeń. Nadrobne informacije k žadanjam na městna nańdu zajimcy na internetowej stronje www.caritas-oberlausitz.de pod rubriku aktualne wupisanja džěłowych městnow. Tež telefonowe naprašowanja su móžne pola Sylwije Scholz, telefonowe čisło (0 35 91) 49 82 88 abo pisomne z mailku na s.scholz@caritas-oberlausitz.de